



Peter Olsen  
Inatsisartuni ilaasortaq, Inuit Ataqatigiit

**Inatsisartut suleriaasianni § 37 naapertorlugu apeqquteqaat nr. 14, PANAM 2018-  
ip Kalaallit Nunaanni ingerlanneqarnissaa pillugu**

18-01-2017  
Sagsnr. 2017 - 1323  
Dok. nr. 4361536

Asasara Peter Olsen,

Postboks 1029

3900 Nuuk

Tlf: +299 34 50 00

Fax: +299 32 20 73

Email: iiknn@nanoq.gl

www.nanoq.gl

Qujanaq apeqquteqaatinnut panamerikkarmiut 2018-imi assammik arsarlutik unammersuaarnissaat pillugu.

**1. 2018-mi Amerikap nunataamiut pissartangorniunnissaannut (Pan  
Amerikanske Mesterskaber) Nuummi pisussami naalakkersuisut  
peqataanissaminnut tapersersuinissaminnullu qanoq piareersimatigaat?**

Akissut: 2017-imi Aningaasanut Inatsimmi siunertamut tamatumunnga aningaasanik immikkoortitsisoqarnikuunngilaq. Naalakkersuisulli nunatsinni timersoqatigiit kattuffiat (GIF) suleqatigalugu periarfissat misissorpaat – aningaasaliissutaasut iluanni – aaqqissuussinermik tapersersuisinnaaneq eqqarsaatigalugu.

**2. Nunatta pitsaanerit pingasut akornanni inissinnissaat, tamatumalu  
kingunerisaanik nunarsuarni pissartangorniutivinnissamut  
angussinnaanissaat anguniarlugu naalakkersuisut qanoq  
iliuuseqassamaarpat? Imaluunniit qanoq iliuuseqarpat?**

Akissut: Naalakkersuisut nunatsinni timersoqatigiit kattuffiat aamma Elite Sport Greenland (ESG) suleqatigalugit naammassisassatut isumaqatigiissummik suliaqartarput, tassani ilaatigut illuatungeriit aalajangersartarpaat ingerlatassani anguneqarsinnaasutut ilimagisat.

Naalakkersuisut isumaqarput timersortartut namminneq pikkoriffiginerugaat suliniutissaminneq aallartitsisarneq suliniutinillu annertusaasarneq. Naalakkersuisulli inatsisiliornikkut killiliussatigut ingerlatsinermilu killiliussat tunniunneqarsimasut iluanni timersorneq tapersersorpaat, - kisiannili pilersaaruteqaratik timersornerup naalakkersuinermik suliaqartunit akuleruffigineqannginnissaanik ileqqoqarneq allanngortissallugu.

**3. Naalakkersuit isumaat naapertorlugu iliuusissat suut pisariaqarpat  
nunatta pitsaanerpaat pingasut akornannut inississappata?**

Akissut: Oqaatigineqareesutut Naalakkersuisut timersorneq tapersersorpaat GIF-ilu naammassisassanut isumaqatigiissuteqarnikkut, aammalu Naalakkersuisut GIF-ip tamatumani iliuusissanut pilersaarutai suliniutaalu tapersersorpaat. Timersoqatigiit

kattuffiata nunatsinni timersornikkut ingerlatsinermik siuarsaaniarneq annertuumik sulissutigaa, Naalakkersuisullu suliat taakkua malinnaavigaat. Naalakkersuisut isumaqarput GIF aamma ESG pitsaasumik suliniuteqartut sungiusaasartunik ineriartortitsinermi, taamalu timersortartut kalaallit sapinngisamik pitsaanerpaanik angusaqarniartarnerini. Naalakkersuisullu tamatuma saniatigut qularutiginnigilaat timersortartut periarfissatik tamaasa atortaraat sungiusarnermut, sapinngisaminnik timersuutiminni angusaqarniartarnerminni periarfissatik pitsaanerpaatinniarlugit, minnerunngitsumillu nunarsuarmiut akornanni unammersuaartarnernut atatillugu. Siunissami inuussutissarsiutigalugu timersorneq ingerlanneqarsinnaalissappat aningaasat maanna agguanneqartartut naammanngillat immikkullu iliuuseqartoqartariaqassaaq tamanna piumasarineqassappat.

**4. *Pitsaanerpaat pingasut akornannut inissinnisaaq Naalakkersuisut soqutigisarinerpaat?***

Akissut: Naalakkersuisut soorunami neriutigaat unammisartortagut angusarissaartarumaartut, soorluttaaq Naalakkersuisut neriutigisaraat nunatsinni unammisartut timersuutini allani aamma angusarissaartarnissaat.

**5. *Immikkut ittumik aningaasaliisoqarnissamik pisariaqartitsissoqassappat, Naalakkersuisut immikkut ittumik aningaasaliissuteqarsinnaanermik piareersimappat imaluunniit piumassuseqarpat?***

Akissut: Naalakkersuisut piumassuseqarput aaqqissuussinernut tapersersuinissaminnut inatsisini periarfissaasut iluanni. Naalakkersuisullu soqutigaat nunatsinni timersoqatigiit kattuffiat - GIF – suleqatigalugu pineqartutut nunarsuarmiut unammersuaartarnerinik maani nunatsinni aaqqissuussisoqartarnissaa, pingaartillugulu taamatut aaqqissuussinerit timersuutitut allanut iluaqtissarsissutaasarnissaat.

**6. *Pissartanngorniunnernik aatsaat taama angitigisumik pingaaruteqartigisumillu nunarput aaqqissuuseqataasunngorpoq (AWG 2016 eqqaassanngikkaanni). Tamanna nunatta nammassinnaanerpaat? Unammiffissat inissaqartinneqarnerullu tungaasigut?***

Akissut: Naalakkersuisut ilisimavaat Panamerican Team Handball Federation (PATHF) unammersuaarnerit pineqartut aaqqissuunneqartarnerannut tunngatillugu, aammalu unaminernut namminernut tunngatillugu aalajangersimasunik piumasaqaateqartarmat. Naalakkersuisut ilisimatinneqarput Nuummi timersortarfeqarnikkut periarfissat piffissami matumani PATHF-ip piumasaqaataanik naammassinnissinnaanngitsut. Kalaallit Nunaanni Assammik Arsarnermut Kattuffiup tamanna aamma paasisimavaa, isumaqarlunilu unammilligassamut tamatumunnga aaqqiissutissarsisoqarsinnaasoq.

**7. *Taamatut aaqqissuussinisaaq Naalakkersuisut isumaat naapertorlugu nunatsinnut qanoq pingaaruteqartigaa qanorlu kinguneqarsinnaava?***

Akissut: Naalakkersuisut timersornikkut aaqqissuussineq pineqartoq pingaartippaat, nunarsuarmiut aaqqissuussineri timersornermi tassani pitsaasumik sunniuteqarsinnaammat, inuiaqatigiinnullu aamma ajunngitsunik sunniuteqarsinnaalluni. Naalakkersuisullu neriutigaat timersornermi kattuffiit allat tamarmik GHF-ip suliniutaa qiimmassaatigissagaat, namminnerlu timersuutiminni suliniutissaminnut

isumassarsiorfigalugu. Ilinniutaassooq alloriarnerussallunilu aamma timersuutit allat assingusumik siunissami aaqqissuussisinnanissaannut. Naalakkersuisulli malugeqqussavaat timersuutit tamarmik pingaaruteqarmata, peqataatinneqartariaqarlutillu timersornermi aningaasaliissutissanik tullerijaarisarnerni.

**8. Nunatsinnut tamanut aammalu tikeraartussatsinnut tamanut nuannernerpaamik misigisaqarfiusinnaaqqullugu Naalakkersuisut qanoq pilersaaruteqarpat?**

Akissut: Naalakkersuisut naatsorsuutigaat GHF-ip siunnersuutigiumaaraa komité-mik aqutsisuusussamik pilersitsisoqarnissaa, Arctic Winter Games 2016-imi aaqqissuussinermut assingusumik. Taamaasilluni susassaqtut tamarmik qularnaareqataasinnaapput aaqqissuussinerup iluatsinnissaanut, - ajunngitsunillu misigisaqartoqarnissaanut, - nunatsinni najugaqartuni aamma nunatsinnut tikeraani.

Inussiarnersumik inuulluaqqusillunga  
Med venlig hilsen

  
Doris Jakobsen